

SOALAN NO. : 34

**DEWAN RAKYAT MALAYSIA
PERTANYAAN JAWAB LISAN**

PERTANYAAN : JAWAB LISAN

**DARIPADA : DATO' SRI DR HAJI IR MOHIZAM BIN
IBRAHIM [KUALA SELANGOR]**

TARIKH : 6 APRIL 2017 (KHAMIS)

NO. RUJUKAN :

SOALAN:

Dato' Sri Dr Haji Irmohizam Bin Ibrahim [Kuala Selangor] minta **MENTERI SUMBER ASLI DAN ALAM SEKITAR** menyatakan supaya mengkaji semula *Standard Operating Procedure* (SOP) aktiviti perlombongan dengan mewajibkan setiap pengusaha lombong menimbus semula bekas lombong bagi mengelak berlakunya perkara-perkara yang tidak diingini disamping mengenakan tindakan berat ke atas mereka yang gagal mematuhi.

JAWAPAN:

Tuan Yang di-Pertua,

Seksyen 20 Akta Pembangunan Mineral 1994 berkenaan peninggalan lombong (mine abandonment) memperuntukkan mana-mana lombong atau kawasan pembendungan buangan (waste retention areas) yang akan diberhentikan dan ditutup hendaklah dijadikan selamat sebelum ditinggalkan. Kegagalan mematuhi peruntukan seksyen 20 Akta ini adalah melakukan suatu kesalahan dan boleh, apabila disabitkan, didenda tidak melebihi lima puluh ribu ringgit atau dipenjarakan selama tempoh tidak melebihi tiga tahun atau kedua-duanya.

Di samping itu, di bawah Peraturan-Peraturan Pembangunan Mineral (Skim Pengendalian Melombong, Pelan dan Buku Rekod) 2007 telah mewajibkan semua pengusaha untuk mengemukakan suatu Skim Pengendalian Melombong yang antara lainnya mengandungi cadangan pemulihan secara progresif dan cadangan penutupan lombong. Skim tersebut perlu dipatuhi oleh pengusaha dan aktiviti tersebut dikawalselia oleh Jabatan Mineral dan Geosains.

Kaedah menimbus lubang yang terhasil daripada aktiviti pengekstrakan mineral merupakan salah satu dari kaedah-kaedah pemulihan bekas lombong. Walau bagaimanapun, terdapat kaedah lain yang boleh digunakan oleh pengusaha bagi memulihkan lombong mengikut perancangan kegunaan akhir tanah tersebut seperti penstabilan cerun, dan *revegetation*.

Dalam hal ini, Kementerian menegaskan sekiranya pengusaha gagal untuk mematuhi Skim Pengendalian Melombong yang telah diluluskan

akan dikenakan tindakan tegas berdasarkan perundangan yang sedang
berkuat kuasa.

Sekian, terima kasih.